

HOOFSTUK 19: STIG VAN VOORTREKKERS IN DIE PLAASLIKE GEMEENSAP

1. INLEIDING

- 1.1 Die grondwet bepaal dat 'n gebiedsbestuur spanne los van 'n Voortrekkerkommando en veldkornetskappe los van 'n Voortrekkerkommando asook Voortrekkerkommandos binne die betrokke gebied tot stigting kan bring ten einde Die Voortrekkers op die vierde bestuursvlak (plaaslike gemeenskap) te organiseer.
- 1.2 Die persoon wat die aanvoorwerk doen in die gemeenskap, stel die adjunkgebiedsleier [administrasie] van die betrokke gebied waarbinne die stigting van 'n groep van Voortrekkers oorweeg word, van die voorneme in kennis.
- 1.3 Die betrokke adjunkgebiedsleier [administrasie] reël dat 'n gevolmagtigde van die gebiedsbestuur die betrokkenes besoek om te verseker dat almal ondubbelsinnig verstaan waarom dit in *Die Voortrekkers* gaan: grondslag, wese, doelstellings, kode, lidmaatskap vereistes, organisasie, werkwyse en gesagsveld word hanteer. Toepaslike literatuur word ook vertoon en verduidelik.
- 1.4 Die persoon wat die aanvoorwerk doen en die gevolmagtigde soos in artikel 1.3 genoem bepaal of daar 'n lewensvatbare groep gestig kan word en vra dan skriftelik toestemming van die gebiedsdagbestuur om voort te gaan met plaaslike reëlings.
- 1.5 Wanneer daar na die oordeel van die gebiedsdagbestuur voldoende bewese steun vir 'n lewensvatbare groep bestaan en daar nie reeds plaaslik 'n groep Voortrekkers bestaan nie, gee die adjunkgebiedsleier [administrasie] toestemming dat met die voorgename stigting voortgegaan word.
- 1.6 Die gebiedsdagbestuur bepaal dat daar voortgegaan moet word tot die stigting van een van die drie plaaslike groeperings, nl 'n Span los van 'n Voortrekkerkommando (3 tot 12 persone) of 'n Veldkornetskap, los van 'n Voortrekkerkommando of 'n Voortrekkerkommando afhangende van 'n funksionele werkbare eenheid.

2. ALGEMENE BEPALINGS

- 2.1 Die gesagsveld van 'n span los van 'n kommando is beperk tot die lede wat by die betrokke span geregistreer is.
- 2.2 Die gesagsveld van 'n veldkornetskap los van 'n kommando is beperk tot die lede wat by die veldkornetskap geregistreer is.
- 2.3 Die gesagsveld van 'n Voortrekkerkommando is beperk tot die lede wat by die kommando geregistreer is.
- 2.4 'n Span los van 'n Voortrekkerkommando *is nie 'n bestuursliggaam van Die Voortrekkers* nie en die spanne funksioneer altyd onder toesig van 'n kommando wat deur die betrokke gebiedsbestuur as voog aangewys is.

3. STIGTING VAN SPANNE LOS VAN 'N VOORTREKKERKOMMANDO

3.1 Registrasie

- 3.1.1 Die Voortrekkerspan word deur die adjunkgebiedsleier [administrasie] geregistreer.
- 3.1.2 Die gebiedsdagbestuur keur sodanige aansoek goed en registreer so 'n span onderhewig aan die volgende voorwaardes:
 - a) dat die betrokke gebiedsdagbestuur 'n Voortrekkerkommando benoem om as voog oor die span op te tree en te help waar dit nodig en moontlik is en
 - b) dat aan die getalvereistes in artikel 3.2 van hierdie hoofstuk voldoen word.
- 3.1.3 Die betrokke span funksioneer na registrasie as 'n amptelike span van *Die Voortrekkers* in die betrokke gebied met alle voorregte en verantwoordelikhede wat daaraan verbonde is.
- 3.1.4 Indien 'n lid buite die grense van 'n Voortrekkerkommando met sy Voortrekkerwerk wil voortgaan moet dit geskied in oorleg met die betrokke kommandodagbestuur waar die lid geregistreer word nadat goedkeuring by die betrokke gebiedsdagbestuur bekom is.

3.2 Samestelling

- 3.2.1 'n Span los van 'n Voortrekkerkommando bestaan uit minstens drie lede en 'n spanoffisier wat verantwoordelikheid vir die span aanvaar tot 'n maksimum van 20 lede.
- 3.2.2 Sodanige span kan uit lede van albei geslagte en verskillende ouderdomme bestaan.

- 3.3.3 'n Jeuglid of jeuglede wat buite die grense van 'n Voortrekkerkommando voortgaan met sy Voortrekkerwerk, kan dit onder toesig van sy ouers doen met die voorbehoud dat een van die ouers as jeugvriend registreer en die kommandodagbestuur die werk van tyd tot tyd kontroleer en getroue diens beoordeel.

3.3 Magte, pligte en werksaamhede

- 3.3.1 Die voorskrifte in hoofstuk 20, artikel 9, van die reglemente, is ook van toepassing op spanne los van Voortrekkerkommando's.
- 3.3.2 Die offisier en spanlede doen op die voorgeskrewe wyse aansoek om lidmaatskap by die gebiedsdagbestuur en word na goedkeuring as lede geregistreer.
- 3.3.3 Die lede betaal die ledegeld aan die spanoffisier wat 'n rekening daarvoor open en die lede se verpligtinge daaruit aan die gebiedsdagbestuur oorbetaal.
- 3.3.4 Die span handel die werk wat vir die jaar vir die betrokke lede voorgeskryf is, af.
- 3.3.5 Die lede kry erkenning vir elke voltooide diensjaar en vir die voorgeskrewe graadwielwerk en spesialisasies wat hulle voltooi.
- 3.3.6 Die lede kan aan gebiedsaktiwiteite deelneem.
- 3.3.7 Die spanoffisier kom op die adreslys van die betrokke gebied en ontvang alle omsendbriewe van die gebiedsdagbestuur.
- 3.3.8 Die spanoffisier kan offisiersopleiding ondergaan.
- 3.3.9 Die spanoffisier woon vergaderings van die betrokke oordbestuur in waarnemende hoedanigheid by.

3.4 Uitbreiding

Die offisier van 'n los span probeer om waar moontlik meer lede te werf om uiteindelik 'n veldkornetskap los van 'n kommando of 'n selfstandige Voortrekkerkommando te vorm.

3.5 Ontbinding

Wanneer 'n span, los van 'n Voortrekkerkommando ophou om te bestaan, moet die gebiedsbestuur toesien dat die voorskrifte in verband met ontbinding soos bepaal in hoofstuk 14, artikel 2 van die reglemente, nagekom word.

4. STIGTING VAN VELDKORNETSKAPPE LOS VAN 'N VOORTREKKERKOMMANDO

4.1 Registrasie

- 4.1.1 Wanneer daar 'n aantal Voortrekterspanne (insluitende staatmakers) gevorm word op 'n plek waar nie 'n kommando bestaan nie, of wanneer 'n veldkornetskap los van 'n kommando gevorm word, doen die veldkornet of persoon wat die inisiatief geneem het by die betrokke adjunkgebiedsleier [administrasie] aansoek om 'n veldkornetskap los van 'n Voortrekkerkommando te registreer.
- 4.1.2 Die betrokke gebiedsdagbestuur keur sodanige aansoek goed en registreer so 'n veldkornetskap onderhewig aan die volgende voorwaardes:
- a) dat die betrokke oord 'n naburige kommando benoem om as voog oor die veldkornetskap op te tree en te help waar dit nodig en moontlik is.
 - b) dat aan die getalle vereistes in artikel 4.2 van hierdie hoofstuk voldoen word.
- 4.1.3 Die betrokke veldkornetskap funksioneer na registrasie as 'n amptelike veldkornetskap (op dieselfde vlak as 'n kommando) van *Die Voortrekkers* in die betrokke gebied met alle voorregte en verantwoordelikhede wat daaraan verbonde is.

4.2 Samestelling

- 4.2.1 'n Veldkornetskap los van 'n Voortrekkerkommando bestaan uit 20 tot ongeveer 40 lede en verdeel in 'n aantal spanne volgens die voorskrifte vervat in hoofstuk 20, artikel 9 van die reglemente.
- 4.2.2 Sodanige spanne kan uit lede van albei geslagte bestaan.
- 4.2.3 'n Offisier moet vir elke span verantwoordelikheid aanvaar.

4.3 Magte, pligte en werksaamhede

- 4.3.1 'n Veldkornetskap los van 'n kommando funksioneer soos 'n kommando met die veldkornet

wat die take van 'n kommandoleier vervul en die veldkornetskapsbestuur wat soos 'n kommandobestuur en offisierraad funksioneer soos uiteengesit in hoofstuk 20, artikels 5 tot 6 van die reglemente.

- 4.3.2 Die offisiere en jeuglede doen op die voorgeskrewe wyse aansoek om lidmaatskap by die betrokke gebiedsdagbestuur en word na goedkeuring as lede geregistreer.
- 4.3.3 Die lede betaal die ledegeld by die veldkornetskap in en die veldkornetskap betaal hulle verpligtinge daaruit aan die gebiedsdagbestuur oor.
- 4.3.4 Die spanne handel die werk wat vir die jaar vir die betrokke span voorgeskryf is, af.
- 4.3.5 Die lede kry erkenning vir elke voltooide diensjaar en vir die voorgeskrewe graadwielwerk en spesialisasies wat hulle voltooi.
- 4.3.6 Die lede kan aan gebiedsaktiwiteite deelneem.
- 4.3.7 Die gebiedsdagbestuur stuur sy omsendbriewe aan die betrokke veldkornetskap.
- 4.3.8 Die veldkornet woon vergaderings van die betrokke oordbestuur in waarnemende hoedanigheid by.

4.4. Die veldkornetskapsbestuur

- 4.4.1 'n Veldkornetskapsbestuur word saamgestel vir elke veldkornetskap los van 'n kommando.
- 4.4.2 'n Veldkornetskapsbestuur bestaan uit:
 - a) 'n veldkornet;
 - b) 'n sekretaris;
 - c) al die spanoffisiere;
 - d) heemraadslede verkies deur die ouers van die jeuglede, onderhewig daaraan dat die getal heemraadslede ten minste 20% maar nie meer as 40% van die getal offisiere is nie.
- 4.4.3 Die dienstermyn van 'n veldkornetskapsbestuur van 'n veldkornetskap los van 'n kommando is een jaar.
- 4.4.4 Die veldkornetskapsbestuur vergader so dikwels as wat dit nodig is, maar minstens een keer per kwartaal.
- 4.4.5 Die veldkornet tree op as voorsitter en die sekretaris as sekretaris by alle vergaderings van die veldkornetskapsbestuur.
- 4.4.6 Die sekretaris roep alle lede wat sitting het in oorleg met die veldkornet op na vergaderings van die veldkornetskapsbestuur.
- 4.4.7 'n Gewone meerderheid van die lede van die vergadering vorm 'n kworum vir 'n vergadering.
- 4.4.8 Die vergaderingsprosedure soos in hoofstuk 18 van die reglemente, bepaal, word tydens alle vergaderings van die veldkornetskapsbestuur gevolg.
- 4.4.9 Die veldkornetskapsbestuur het meer bepaald die volgende take:
 - a) om die take te verrig wat in artikel 22.5 van die grondwet asook in hoofstuk 20, artikel 7.3 van die reglement aan 'n offisierraad opgedra word;
 - b) om toe te sien dat die veldkornet die vergaderings van die betrokke oordbestuur as 'n waarnemer bywoon;
 - c) om aan die verkiesing van die oordleier en gebiedsleier deel te neem soos in hoofstukke 22 en 23 van die reglement onderskeidelik bepaal;
 - d) om 'n afgevaardigde na die kongres aan te wys soos in hoofstuk 25 van die reglemente, bepaal.

4.5. Uitbreiding

Die veldkornetskapsbestuur van 'n veldkornetskap los van 'n kommando probeer om waar moontlik meer lede te werf om uiteindelik 'n selfstandige Voortrekkerkommando te vorm.

4.6. Ontbinding

Wanneer 'n veldkornetskap los van 'n kommando ophou om te bestaan moet die oord toesien dat die voorskrifte in verband met ontbinding soos in hoofstuk 14, artikel 2 van die reglemente, bepaal, nagekom word.

5. STIGTING VAN 'N VOORTREKKERKOMMANDO

5.1 Stigtingsvergadering

- 5.1.1 Indien dit blyk dat 'n funksionele werkbare Voortrekkerkommando gestig kan word, moet die gebiedsdagbestuur 'n stigtingsvergadering beplan.
- 5.1.2 Die betrokke adjunkgebiedsleier [administrasie] reël vir 'n voorsitter van die stigtingsvergadering, verkieslik die oordeleier waaronder die kommando sal ressorteer.
- 5.1.3 Die stigtingsvergadering word na oorlegpleging met die aangewese voorsitter belê, onderhewig daaraan dat minstens 10 dae kennis daarvan gegee word aan alle voornemende offisiere, ouers van belangstellende jeuglede en jeugvriende.
- 5.1.4 Die persone wat op die stigtingsvergadering aanwesig is, vorm 'n kworum.
- 5.1.5 Alle persone wat op die vergadering teenwoordig is (die voorsitter ingesluit), het stemreg.
- 5.1.6 Die sakelys van die stigtingsvergadering moet spesifiek die volgende sake insluit:
- Opening en verwelkoming;
 - Die verkiesing van 'n sekretaris vir die vergadering;
 - Die doel van die vergadering;
 - Verduideliking van die grondslag, wese, doelstellings, lidmaatskapsvereistes, organisasie en werkwyse van *Die Voortrekkers*;
 - Verduideliking van die hooftake, organisasie, werkwyse en gesagsveld van 'n Voortrekkerkommando asook grensreëlings met naburige kommando's;
 - Verslag van aksies wat reeds plaasgevind het;
 - Formele stigting;
 - Voorstelling van voornemende offisiere;
 - Aanwysing van heemraadslede volgens voorgeskrewe prosedure;
 - Die byeenroeping van die eerste kommandobestuursvergadering direk na die stigtingsvergadering.
- 5.1.7 Indien daar staatsmakers in die kommando is word gehandel volgens die toepaslike bepalings in hoofstuk 8 van die reglemente.

5.2 DIE EERSTE KOMMANDOBESTUURSVERGADERING

- 5.2.1 Die eerste kommandobestuursvergadering vind plaas onder voorsitterskap van die persoon wat die gebied as voorsitter aangewys het.
- 5.2.2 Die sekretaris van die eerste kommandobestuursvergadering is die persoon wat by die stigtingsvergadering as sekretaris opgetree het.
- 5.2.3 Die sakelys van die eerste kommandobestuursvergadering moet voorsiening maak vir die volgende sake:
- verkiesing van die kommandodagbestuur;
 - verkiesing van veldkornette;
 - aanvulling van die heemraadslede (indien enige van die nuut verkose heemraadslede tot die kommandodagbestuur verkies word);
 - aanwysing van verteenwoordigers van die kommandobestuur op ander toepaslike liggame;
 - bepaling van die kommandonaam op voorwaarde dat die naam deur die gebiedsdagbestuur goedgekeur moet word en dat 'n kommando nie na 'n nog lewende persoon vernoem mag word nie;
 - goedkeuring van die kommandojaarprogram;
 - vasstelling van die kommandoheffing wat saam met die ledegeld die registrasiegeld vir lede vir die betrokke jaar vorm;
 - goedkeuring om 'n bankrekening by 'n erkende bankinstelling te open en toekenning van tekenmagte;
 - reëling vir die opleiding van offisiere en ander volwassenes;
 - behandeling van die jongste gebiedsomsendbrief.
- 5.2.4 Die nuutverkose kommandodagbestuur voltooi die aansoekvorm om registrasie as 'n kommando.
- 5.2.5 Die persoon wat as voorsitter by die stigtingsvergadering opgetree het, voltooi 'n stigtingsverslag.

- 5.2.6 Die nuwe staatmakers, offisiere en heemraadslede doen op die voorgeskrewe wyse aansoek om lidmaatskap.
- 5.2.7 Die nuutverkose adjunkkommandoleier [administrasie] besorg die aansoek om kommando-registrasie, die stigtingsverslag en die aansoeke om lidmaatskap van alle volwasse lede aan die adjunkgebiedsleier [administrasie].

5.3 REGISTRASIE VAN DIE VOORTREKKERKOMMANDO

- 5.3.1 Die adjunkgebiedsleier [administrasie] bepaal volgens die bestaande beleid of die betrokke stukke in orde is.
- 5.3.2 Die adjunkgebiedsleier [administrasie] reik 'n registrasiesertifikaat vir die betrokke kommando uit wanneer aan die vereistes voldoen is. Hierna funksioneer die kommando as 'n amptelike Voortrekkerkommando van *Die Voortrekkers* in die betrokke gebied met alle voorregte en verantwoordelikhede wat daaraan verbonde is en in hoofstuk 20 van die reglemente omskryf word.